


玉笥集

四、五、六、七

柳田文庫
文庫11
D 206
2



文庫 11
D 206
2

010190556099



玉笥集卷四

歌吟

桃花馬歌

房星下飲瑤池清。神光夜化花龍精。東風滿背騎不得。
 冰痕淨洗黃魚腥。斑斑朱英點晴雪。滴滴真珠汗凝血。
 高蹄蹴踏花雨香。仰面嘶春春正熱。周家穆滿遊元圃。
 萬里西馳覲王母。青絲繫樹搖玉珂。錦繡叢中五雲舞。
 歸來復入元都觀。紫陌韶華政零亂。天閑不數連錢驄。

元

張憲

撰



路人只作文彪看。天台九曲溪流芳。解鞍春水浮丹光。
劉郎牽入落花去。撲面玉鞭蝴蝶忙。風流自許王武子。
未信叔癡癡不語。千年駿骨作銅聲。燕昭臺高金似土。

走馬歌

春風壓城紫燕飛。繡鞍寶勒生光輝。軟沙青草平似鏡。
花雨滿巾風滿衣。潛蛟雙縮玉抱肚。朱鬣生光散紅霧。
金龍五爪蟠彩袍。滿背真珠撒秋露。生後俊健雙臂長。
左脚踏鐙右蹴韁。銅鏡四扇遶十指。玉聲珠碎金琅璫。
黃蛇下飲電掣地。錦鷹打兔起復墜。袖雲突兀鞍面空。

銀甕馳囊兩邊緹。西宮彩樓高插天。鳳凰繚繞排神仙。
玉皇拍闌誤一笑。不覺四蹄如迸烟。神駒長鳴背凝血。
郎君轉面醉眼纈。天恩翦下五色雲。打鼓歸來汗如雪。

嘔出錦心可與桃花爭
奇決非驢上詩人語也

宛平主簿驪馬歌

宛平火主簿堂訪余於大都雙
橋里指其所乘驪馬曰能騎此

否余笑曰虎則不能若馬也余固能之矣適翰林
承旨汪闕台從騎三十餘自西而東既過余乃執
策就馬足甫及鎔則已奮迅馳突入翰林隊中矣
羣馬辟易於烟塵中但聞翰林厲聲曰好馬南馳
至南橋越塹而過俯身就韁韁比及手已馳過樞
密院街矣遂縱轡至哈達門而回主簿訝余久不
返騎他馬來追遇於天師庵執手大笑竝轡
歸飲漏下初鼓乃散明日主簿索歌乃歌曰

熒惑官中一團火。踢倒祝融掣金鎖。飛來塵世化赭虬。
滿背紅雲結花朵。絳鬃拂膝朱尾長。赤瑛絡腦紅絲韉。
炎光閃閃照人熱。渴死造父愁王良。北平公子宛平簿。
萬鎰黃金求赤兔。黃羅袜首袴褶靴。虎氣逼人如呂布。
江南書生力不多。一躍五丈飛官河。翰林馬上失聲笑。
但見碧烟如鳥過。電光拂眼騰朱梭。駿快不數生蛟鼉。
研朱爲寫紅叱撥。喚起杜陵賡我歌。

樹稼謠

西風一夜吹黃沙。千林萬木森瓊芽。江南客子未嘗見。

認作燕山臘雪花。晶明皎潔枝條小的。爍珠兒照瑤草。
金刀擊破雲母屏。六出梅花碎龍腦。銀絲精巧細如毛。
觸蠻戈戟槐安刀。春秋一筆照千古。天人感應誰能逃。
妖星上射廣寒府。粉黛三千淚如雨。姮娥不起元霜飛。
玉兔空提雲外杵。蓬萊仙藥救不活。萬里悠悠夢魂闕。

酬海藏主紙扇歌

海一漚氣骨有似生驂騑。凡韁俗絡羈不得。西望八駿
瑤池游。終焉不遂志。屏棄妻子。祝髮爲比丘。遨遊名山
川。脚趺不肯休。誓絕俗士交。有語常不酬。西來貽我白

紙扇瀟洒不畫三湘秋。雙石相對峙。下壓長江流。上有
禿髮翁。踞坐披羊裘。手垂獨繭絲。下掛直鐵鉤。其意不
在鱸與鮒。涼風從西來。短髮吹颼颼。故人位九五。駕六
龍。垂冕旒。諫議亦好官。視若囹圄囚。作書罵丞相。傲氣
凌公侯。天星徹夜鬧。帝座疑有憂。胡爲太史公。仰觀勞
心眸。偶然共臥伸一足。誤壓天子腹。奚足尤。飄然納爵
去。天子不可留。清灘七里水如玉。上縛草廬下艤舟。有
時耕白雲。鞭青牛。何庸圖像南宮樓。我今把釣釣臺去。
海漚此意知我否。海漚此意知我否。此篇亦似生馬悍
氣不可羈也知此

僧不
凡

伍拏罕元帥斬新李行

中原惡少稱新李。八尺長軀勇無比。鐵鎗丈二滾銀龍。
白面烏騅日千里。攻州劫縣莫敢櫻。烏羊渾脫縵胡纓。
輕車壯士三十兩。戰則爲陣屯爲營。殿前將軍不敢搏。
羽林孤兒甘受縛。柳林道上掠寶車。獨樹堆邊劄氍毹。
吐蕃老帥西南來。虎頭不掛三珠牌。弊衣羸馬失故態。
寶刀繡澀盈生埃。步入中書謁師相。願請長纓三百丈。
生縛兇魁獻至尊。不使朝廷乏名將。相臣入奏大明宮。

玉旨特賜天廡。驄親軍百騎。備兩翼。綠旗畫出東華東。
硬弓二石力。逾弩長驅。夜走涿城下。土岡無樹著伏兵。
兩陣相當如怒虎。彎彎弓。稍抱團月。點點鎗尖飛急雪。
神騅未隨白羽仆。賊顛已逐青萍缺。一騎平原報捷歸。
天狗有聲流作血。

北庭宣元杰西番刀歌

此刀乃江浙平章敏化公征淮西所佩者

金神起持水火齊。煅鍊陰陽結精銳。七月七日授冶師。
手作鉗鎚股石礪。一千七百七十鋒。脊高體狹刀口洪。
龍飛蛟化歲月久。阮師舊物今無蹤。瓜哇繡鑲柔可曲。

東倭純鋼不受觸。賢侯示我西番刀。名壓古今刀劍錄。
三尖兩刃圭首圓。劍脊黝黑生黑烟。朱砂斑痕點人血。
雕青皮軟金鉤聯。唐人寶刀誇大食。於今利器稱安息。
十年土澗松紋生。戎王造時當月蝕。平章遺佩固有神。
朱虛固始多奇勳。三公重器不虛授。往繼王祥作輔臣。

西雲篇爲李山人賦

金天之西其西孰存。有雲英英。運如車輪。上拂若木枝。
下蟠崑崙根。六龍之所窟宅。二氣之所結屯。中有滂沛。
澤可以蘇乾坤。何人獨幹元化柄。坐使天道久失尊。十

玉簪集卷四
五
烏竝出四海皆焚槁裂下土萬彙不蒙恩吾將上天問
叩天闈諮元父勅天孫命傳說騎箕鼓罡風以駿奔以
爾彌縫混沌浩然使七竅無垠

槎洲歌

明珠洲水西行九萬七千里上直箕尾通銀河洲中之
地三萬六千頃下有登天貫月槎洲旁瑤草白似雪瓊
林大樹高可五百尺樛枝的礫琉璃葩人間百世始一
日何有寒暑歲序白兔隨朱鴉家雞曉啼朝陽九苞鳳
家犬晝戲于闐獅子五色石盤拏雪龍切鱠色奪日月

露注酒光燦霞白石髓青胡麻王母蟠桃七顆碧玉斗
安期大棗五尺青銅瓜明星之精化作老仙降槎上手
揮白鸞尾身坐白鹿車長髮晞綠水童臉浮丹砂西方
康胡跪進酒南極丈人來獻花蓬萊散仙遣以照書杖
大瀛海伯貢以黃茅芽明星翁壽何遐樂無加時呼鐵
崖老仙友西渡弱水逾流沙杖拄青螭蛇橋踏金蝦蟆
五城十二樓到處皆爲家淋漓宮錦袍倒著青綸紗桑
田東海不足較麻姑三見何庸誇明星翁樂無極壽無
涯吹笙駕鶴一去五千載歸來重醉槎頭槎此又於賀
體離而去

之掉辭孛韻所
謂橫絕嶽起者

薛相士歌

君不聞蔡澤問齒不問貴壽夭不可知富貴能自致又
不見裴中丞貌不逾中人靈臺不可狀容色何足論河
東薛相士兩與中道逢玉笥生一見笑復驚爲言爾相
寒且怪讀書萬卷今何成計羅侵驛馬野雪蔽天庭山
根斷而側地閣削且傾縮頤故不壽黠頰難於榮垂吻
招謗撐頰寡朋利不利名不名東西南北身雲萍玉笥
生胡不抑爾氣庶可全女形坦爾性庶可延女齡胡爲

握手傲世不肯隨逢迎奮髯晨擊劍抵掌夜談兵挽弓
欲射封豕拔刃欲屠長鯨鑄銅立伏波柱蒸土築韓公
城骸誅武陵蠶骨碎斬黃儻呼晉重耳起作踐土會挽
齊小白重結葵邱盟決浮雲不使蔽白日斬彗孛不使
侵前星玉笥生心血赤膽銅青將不逢李郭甲冑雄相
不逢姚宋冠冕英歲月逝去可奈何河山破碎難爲情
玉笥生豪且狂豈不知背可貴黥可王黃金可術致周
鼎可力扛玉笥生頭可斷身可削一寸丹心不可變三
語不爲掾五斗不作縣不求嬖臣推不希狗監薦甘貧

若回甘病若憲頭如虎額如燕食玉橫金何足羨一貧
何以報父師報以孤忠身後傳薛鑒士心如鏡目如電
慎勿逢人易貧賤君不見邗溝一夜轉東風枯楊盡拂
黃金線

戲贈乍浦稅使歌

去年四月雨如竹錢幣不行百姓哭故人走馬初上官
日日誅求征稅足今年四月雨如箭海賊東來船著岸
土兵東走百姓空商征不成官吏散故人本是西河夫
殺賊得官心氣麤如何臨難乃無勇不敢東向鳴桑弧

君不見彭城劉寄奴長刀獨戰今非無詞氣豪宕可
以激立頽靡

白雲觀遠圖歌

儀鑿江邊架層屋萬里江流俱在目上下風帆如馬飛
烟浪雲濤遠相逐山頭白雲遽如許西岸欲晴東岸雨
張公對此倚闌干目送檣烏杳無語樓心有窩深復深
白雲當晝生秋陰少焉因倦閉窩睡咫尺華山無處尋
邊城一夜失關左到處黑灰揚劫火雕檐畫棟飛上天
介馬十年戎事夥秦吳羈府相望開銜命使者勤往來
中流倚櫂慕西顧矯首故居安在哉風流最愛王記室

結攬江山歸彩筆。繭藤一尺破憂思。鬱悒心曾盡。消失
吾聞丈夫不爲無益悲。明日以往未可知。且當把酒對
圖畫。碎擊唾壺歌我詩。君不見白雲一去雖不返。江上
青山常在眼。待君恢復父母邦。重建新樓未爲晚。

君不見簡孫明

君不見文豹隱南山。又不見潛龍居淺水。七日霧雨甘
忍饑。一尺風雷終滌恥。丈夫變化自有時。刺客誰能困
鄉里。爲豹爲龍總未知。切勿輕看游俠子。

吳興才人歌爲沈文舉賦

吳興才人沈亞之。曾懷寶礦獻春闈。璞頑采晦世莫識。
萬里江南負笈歸。歸來破屋壓江水。馬斃僕痛容色死。
勞勞空惱瘦王孫。扼腕長歌淚盈眚。有孫有孫能讀書。
懷寶不進非踟躕。短裙破帽蔽風日。落拓長途驅蹇驢。
東南大府求賢急。華館雄開君不入。商歌金石振秋風。
別足羞同卞和泣。平湖鏡靜九峯青。萬古乾坤一草亭。
寄謝天官賢太史。不勞仰望少微星。

新豐酒贈馬敬常

丈夫重功名。結交須死友。道逢馬賓王。

一作富貴樂少年。貧賤淹老醜。

結交馬賓王 共飲新豐酒燈前快意且高歌莫管明朝遽分
手夕陽衰草長亭柳萬古英雄此中走勸君痛飲勿固
辭更飲為君沽一斗古來流落多不偶鞘裏雄刀作雷
吼不用閑嗔逆旅兒彼識吾曹是誰某君馬駿我馬輕
起看東方明未明與君會食長安城

春山行

須彌削出金芙蓉蒼蒼萬古摩元穹丹砂豈緣闡靈壽
七十二候常春風金骨仙人祕靈寶蟠桃花下金光草
不知壽與天齊傾但見羣真頭白早君不見十八公封

五大夫根盤琥珀枝珊瑚與君繪作春山圖

赤松仙人歌

赤松之山上有宮赤松仙人騎赤龍虬鬚插戟動成把
七粒五粒皆龍駿茯苓入地多神功琥珀照人如酒濃
千年老幹足高壽誰識城南十八公青牛奔走快如鹿
幾見劫灰然若木貪生不數漢文成白日閉門空辟穀
天上金銀十二樓一彈指頃三千秋吾將永棄人間事
馭氣排風從爾遊

鹿皮仙人歌為鐵崖先生壽

鹿皮子方瞳眸曾從羣仙登瀛洲海風高寒不耐冷帝
命王母錫以漢武所獻上林白皮幣月娥親手裁成裘
副以華陽巾佩以蒼玉球授以丹臺長生錄一卷白玉
兔白飯以元雪三千秋歸來人世忽已換九霞文毛至
今溫且柔玩珠之峯洗玉之湫醉跨茅君赤虎戲騎老
子青牛東方小兒畜隱語南極老人躬點籌鹿皮子壽
與五總之龜倂老仙開筵席長流神仙老嫗彈箜篌幔
亭仙客起舞且謳老仙一飲千日酒南山爲俎海作甌
君不見碧紗帽上二十萬錢不得畱九十榮翁帶索行

不休賢哉鹿皮誰與儔優哉鹿皮誰與儔

橘洲行

太湖之水分三支注爲長泖東去無已時泖灣之口有
大橘一樹盤盤蔭門楣里隣呼爲橘洲眾所知洲之上
橘之下矮屋六七間皆茅茨孝子萬生三世以來皆居
之生衣無綾錦華食無肉作糜讀書談道操履步步以
古哲自礪不肯苟爲堂有老親白髮垂必須甘旨備二
膳家貧不常得十年客寄爲人訓其兒所得金悉以爲
奉母資母病下痢不能自潔生卽棄業歸取中裙前漉

穢手奉虎子晝夜伺母不使牀席沾淋漓母有女贅狼
婿不識孝義惟務利日思剝取生家貲甚至湯藥之費
亦來掙尅生卽與之無吝詞惟恐致鬪傷母慈使母不
得瘥以陷終天無窮悲卒能護持母病無恙以終天年
之壽期噫吁噉橘洲之水清且漪橘洲之橘碩且飽飲
洲之水食洲之橘誰無父母思嗟哉萬生孝義今古稀
我詩直欲追韓奇

此篇步驟全是老韓想見
萬孝子不在董南下也

玉壺歌

藍田四萬八千畝玉子團欒大如斗阿剛月斧巧斲成

外潤中虛可盛酒金盤露真珠醅春風吹水桃花腮嗟
爾玉壺子攜壺何處來老奴玉壺何以如意碎亞父玉
斗何以寶劍開玉壺子云是玉京來但知元石之酒可
以千日醉不知雍伯之玉何以千歲栽玉壺子吾當與
爾澆塊磊開雅懷便呼王勣起作醉鄉記更喚李白重
築糟邱臺鳳凰曲鸚鵡杯壺公狡獪不足法玉笥山中
歸去來

玉帶生歌

玉帶生端人也事文山丞相爲文墨賓
與同館謝先生翺友善宋革丞相殉國
死訃聞生與翺哭於西臺之下復悲宋諸陵暴露
私相蓋覆識以冬青木而去後翺道卒生今歸會

稽抱遺老人與秋聲子輩為寮中七客初宋上皇以丞相恩賜以紫衣玉帶至今不改其舊服生為人端厚強記默識不妄開口丞相素重之呼召不以名但曰玉帶生故作玉帶生歌

鸞刀夜割黑龍尾碾作端溪蒼玉砥花鑿鐵面一尺方
紫霧紅光上書几銀絲雙纏玉腰圍翡翠青斑繡紫衣
金星鵠眼不敢現案上墨花皆倒飛景炎丞相魁龍榜
撫玩不殊珠在掌背銘刻骨四十四文山硯銘丹書小篆四十四字云紫
之衣兮綿綿玉之帶兮磷磷中之藏兮淵淵外之澤兮日宣烏乎磨爾心之堅兮壽吾文之傳兮廬陵文天祥造
血錄至今猶可想謝公古文今所師西臺一慟神血
垂獨持老瓦出門去冬青樹邊書憤詞天翻地覆神鬼

怒九廟成灰陵骨露廬陵忠魄上騎箕流落端生何所
寓抱遺老人生計拙愛把文章寫忠烈霜臺一夜電光
飛不必矮桑重鑄鐵

夏蓋山石鼓謠鼓高一丈徑三尺下有盤石為足謠云石鼓鳴三吳兵

臨平石鼓不自鳴直待蜀桐魚作形陳倉石鼓載文字
徒有鼓形無鼓聲夏蓋之石或自鳴蓋石一鳴三吳兵
嗚呼三吳十年厭干櫓不緣夏蓋鳴石鼓

玉龍洞天謠至正己亥冬臘月廿一日飲酒碧雲玉龍洞天其製石室宮然填以粉外植老梅一株鑿竅引南枝入座勢扶疎覆榻上花爛漫開香溫馨浹膚髓時斜月在戶寒光照映如

銀色世界恍不知身在羅浮夢中
也是夜獨宿花下賦詩一章云

海風夜捲蓬婆城金神飛下白玉京爛銀壁立直上八
千尺盤陀頂結穹廬形是何年儵歛帝鑿成東西竅又
何年巨靈老剖破駢脅開雙櫺遂令混沌質太極一判
胚胎凝畸鳥缺兔竊跳擲二氣光爍如珠星玉龍精劈
空入瓊鱗瑤甲聲錚錚蜿蜒屈曲布奇勢獨據巖險誰
與爭碧雲師來西溟蹋颺輪駕雲駟右執策龍鞭左握
縛龍纓呼小巽驅老滕杖龍之脊鎖龍頸抉龍之腦散
作梅檀清優曇曼陀出神相盤空不下交撐擎方牀水

晶座曲几雲母屏姑射仙不敢現羅浮女不敢迎散花
不染金襴縷朝供自作天廚馨碧雲師不坐九眼觀不
閱三藏經手把玉龍尾吹作玉龍聲玉龍聲沈霜五更
月輪挂樹玉林側參旂墮地天盤傾翠羽叫夢東方明
洞天春回晴昊晴

渡揚子江懷祖豫州

四海茫茫混塵土中原興廢誰能數神州陸沈自有由
後人空罪王夷甫王夷甫清談亦解語人主英雄豈無
祖士稚終令神器資強虜

靈竹杖歌爲奎上人作

南能老子畱神跡鉢裏毒龍枯作腊山靈瘞向梅檀林
蛻骨年深勁如石海東昨夜轟霹靂頭角飛空二千尺
奎公一叱來掌中喫作鏗鏘紫筭策紅銅彎跼鸚鵡喙
黑節磔硯狻猊脊色疑湘江栽數合嶰谷裁霞氛結雙
縠雨氣盤瑰腮長身妥尾八卦披鮫胎杖兮杖兮異形
質不比江心桃竹堅而實天祿爝火明一室葛陂風雨
夸幻術韓公赤藤可以拗而屈衛公方筇可以規而漆
孰若紫筭策歸之靈鷲翁嗟嗟靈鷲翁胡不攜爾杖往

獻天王宮截爲二十四管陰陽筒吹作七十二鳳聲雌
雄調六氣宣八風載令黎庶歌時雍功成歸卧西崆峒

贈鐫碑王生歌

太湖之水通吳淞綠波冷浸青芙蓉巨靈神斧斫不去
帝命畱與歷代賢聖鐫奇功奇功曠世信希有至德乃
可齊不朽嗟哉王生習此藝功德不逢長袖手虞黃歐
揭牛毛多筆端佞語如懸河銀鉤鐵畫銜奇麗天下匠
石勞礪磨王生手握三寸鋼肥深瘦淺能自量神椎輕
重心應手白蠹食鐵森成行詞嚴筆勁逼晉漢學士何

玉簪集卷四
五
人美詞翰有亭五彩護龜趺峙立通衢人不看人不看
恐淚垂晉朝羊公今爲誰高山深水苦自置後世誰人
想見之王生王生女當知功德豈在多文辭君不見延
陵季子碑上僅十字千載萬載生光輝

玉斧歌

吳郎璞中半規玉曾向廣寒斫金粟狡狴齧齒怒舉頭
五尺長柯插天木銀花裹腦金盞橢五色天空磨石火
劍脊條成偃月稜光滴露珠三百顆藍河水涸巨神走
白鵠高旗懸紂首瑤瑰合就水晶蓬雲掩般門雙袖手

雷聲夜破妖墓腦月殿重輪間七寶九天八萬下天丁
右秉金旄肆天討凶門未出左黃鉞玉斧鋒鋦利如鐵
白蛇不哭卯金刀斫落猪龍半天血

壽客堂歌

富春朱梓氏營生窳檀樂山下繞籬種
菊創堂其中扁以壽客謁歌於余乃爲

日之歌

綠雲檀欒赤霞小壺中雞犬忘昏曉華鯨叫落青娥愁
夢壓錢鏗歲年天石門潭水流甘芳樓船浪隔長生方
繁英咀齒嗽香玉百歲上壽如南陽海風吹折蓬萊島
九節菖蒲石上老童兒五百不歸來仙磴青懸斷腸草

東山公主魯朱家方頤玉頰塗丹砂寒香五彩富秋色
七十二種金銀花陶公一去秋無語千載東籬悲失所
清霜九月曉生稜紫土新阡開別墅黃金落英白玉船
鳳笙龍管朱絲絃元鵝對舞老鼉笑誰識孺子為神仙
秋風西來秋露白高陵五美爭奇跡百年過客醉清觴
手把黃花題壽客

玉笥集卷四

譚瑩玉生覆校

玉笥集卷五

元 張憲 撰

古詩四

野亭

肅肅野亭在彼中野眷眷隱君寢處其下修竹映戶華
松覆瓦闌楯高明檐楹瀟灑豐草鮮茂雜花妖冶絃有
清瑟飲有文竿遠青層來平碧概瀉言命輕車言駕瘠
馬臨流暫坐釣絲時把詠歌雍容意思閑雅情越義軒
氣劇屈賈清風古今知爾亦寡冠蓋遑遑彼何為者

題趙仲穆蘭竹

羃羃楚雲漠漠湘雨懷人東皋送別南浦秦虜不歸重
華莫覩二女凝佇三閭獨苦惡棘蕩蕩白石魯魯撫卷
潛然淒其千古

題袁子甯瞻雲圖

陟彼太行瞻望白雲哀哀父母疾呼不聞彼陶者瓦爰
覆我廬豈不興念歸讀父書王事多難靡遑止居束束
者竹肅肅者木有石可憩有泉可掬閒哉歸去毋亂心
曲白雲英英東南是征豈不欲往誰與同行道阻且修

莫知所經陸則可輿水則有舟嗟我昆季欲見無由匪
兕匪虎匪蛟匪虬白雲蔽空八荒同陰瞻望弗及搔首
沉吟展圖莊對聊以慰心

畫梅

溫溫春陽皎皎冰雪小橋竹外天然幽絕夷清惠和二
聖孔并報彼色媚望君德馨

方寸鐵爲印工盧奐賦

唐有處士曰賤臣全心一寸鐵正直以剛誓劊蝮腹還
明月光又有奸相曰李十郎腹懷利劍人莫敢當一正

王晉集卷五
一邪不翅臭芳爾免後出方寸錚錚不藉鍛礪自成利
鋼斂鋒蓄銳戲我文場鐫斯刻籀用代筆耕惟多事秋
所在侯王載玉其符亦金其章頑石獻諂赤伏貢狂免
不往刻立取富榮嗚呼免鐵孔方免心孔長持爾利器
往獻我皇刻泰階符俾天下昌無俾爾祖專美有唐

賦得孟軻隱几

文樞鱗鱗烏皮皴皴君子所憑天天申申宴安氣勝乃
有假寐彼大賢者胡甯有是鱗鱗文樞鷄鷄烏皮長者
見絕蓋亦弗思

諸葛武侯像

羽扇飄飄綸巾蕭蕭渭原星墜梁父寂寥

古詩五

呂梁洪彭越廟

黃河東南奔呂梁屹相向蕭蕭彭王廟淒然據其上空
山貌秋色衰草蔚長望荒煙薄殘陽柔櫓破寒浪彭王
古莊士志節素豪宕徒成百戰功不獲寸土葬哀哉虎
兕軀竟作楮中醬可憐黃金甲綵繪泥土像佇想忠壯
魂陰風幾悲悵憂來不忍去駐馬更悽愴

王言集卷五
三
經東阿城

馬鳴西風長赤日在高樹輕車東南征疾驅恐遲莫俄
經東阿城蕪然峙中路空垣烏鵲起遺跡瓦礫聚荒衢
蕃草莽陰穴竄狐兔不見煮膠人舊物并如故尙憐齊
大夫投鼎有餘怖淒然耿弇迹寂寞曹植步我行亦須
與相看等朝露

汶陽道中

汶水東入海疾流無已時可憐齊與魯荒草秋離離日
澹野水黃風高木葉飛繫舟閑弔古不覺淚沾衣

任城道中

客行魯橋道路出毒山驛驅車上峻坂歇馬道傍石雨
來松樹暗風起荷葉白一笑嘆浮生胡爲倦行役

汎舟黃顙湖望梅山

汎舟黃顙湖望見梅仙山嵯峩結寶髻晶淼浮銀灣長
風蕩青蘋雪浪相飛翻魚龍現怪誕水怒山自閑詎知
神靈意杳在虛無閒緬思學仙尉一去何時還幽姿不
可見高風邈難攀落日動簫鼓把酒酬潺湲

冬夜聞雷有感

陽氣渙不收梨花開九月無何元冬夜火靈飛列缺疾
雷放旬旬大雨久不輟頑雲聚復散淫風赤如血蟲豸
不入藏龍蛇競出穴寒威變融煥四序失故節胡爲數
歲中雷向盛冬發委靡不執柄遂爲羣陰竊及其不可
忍奮迅始一決乃於涸寒時礮礮未肯歇龍戰久不解
險難紛糾結旣乖長養意愈使威權褻天怒不終朝王
綱有時裂何能堯吾君調理繼稷契先事誅權奸以次
及羣孽假爾霹靂車爲吾左黃鉞普天新號令坐使萬
國悅煌煌世祖業中道復光烈

詠窮博士

五日張京兆猶能故殺人一年窮博士不救歸裝貧深
冬未衣絮坐席長凝塵愁吟蒼蠅叫怒作蝦蟆嗔冷撥
豆稽火倦臥黃茅茵饑來捕雀鼠夢裏騎麒麟不知貧
作崇猶道詩有神商歌滿天地聲響驚比隣歌罷自激
勵慷慨豪氣伸指摩雄膽畧棄捨貧賤身左挽祖士稚
右指周伯仁往殺諸賊奴救我饑餓民出門復歸來擲
劍一長顰天狼大如月七將空橫陳

贈吳仲舉

手擎白錦鷹日畋剝溪曲人語狡兔起犬行山雉伏春
草足繁露秋風多落木雖非封侯相不負食肉腹厭厭
窮經士閉戶饜糞粥

秋日山寨校兵呈同列

露下草木空四山秋色峻起持餓鷓鴣弓習作長蛇陣旅
分羆虎徒翼若鷹隼奮文成牙旣禡血祭鼓亦衅日光
耀旗影霜威肅兵刃翕張更坐作勇怯迭退進徐如磨
蟻沿忽若奔馬迅向背月輪偃孤虛斗杓運渭原識諸
葛泝水見韓信雖非勅敵遇敢忘出門慎堂堂固莫遏

整整孰敢近哀哀白骨堆纍纍黃金印縱無東可平豈
患西難鎮誰爲人中雄往雪天下憤盡取羈縻域帖然
作州郡

秋日古城葉希聖見訪

夫君滄江來訪予清溪曲清溪窈而深佳氣散天旭塘
蒲澤新雨秋意冷可掬鳥鳴萬山靜猿下雙樹綠相看
語清晤餘響起空谷坐久神宇閑斜陽在高木

西溪出巡寄鍾君顯沈宏道

今日天氣佳整隊適近郭溪迂水聲緩峪逼山勢惡曲

折盤羊腸縈迴行棧閣前驅迭隱見後至猶繹絡虎鳴
彩旛動鳥起柘弓曠試問捫蝨談何如逐禽樂

於潛點砦經托和齊右丞戰地

路迴山麓交直壁萬仞立浮嵐滴空翠下浸澄泓溼長
巒拱天嶽壞道駛礪急眷彼岩險勢一夫自敵十要地
不力戰崩奔胡可戢哀哀左轄公馬革臥原隰孰知王
師重戴首奉賊級我來訪戰地一慟已莫及日入鬼燐
生陰風國殤泣

自臨安往富春過芝泥嶺示隨行李巡檢

平明升肩輿相與東西征浮嵐翳遠道宛在雲中行連
山互低昂曲折如送迎接天蔽喬木澗與風爭聲前登
芝泥嶺雨意漸覺晴曛曩日色薄蕭瑟衣裳輕畏途見
鹿角高砦屯鄉兵綵旗病目眩嚴鼓羈魂驚憑軾若夢
寐撫馘傷浮生顧謂李飛尉我行猶幾程

臨安道中先寄賽景初

朝入臨安山暮上由拳嶺周道無行蹤晴空斷飛影嚴
關固高柵疊嶂列危屏荒坳斜日淡虛市野煙冷息肩
坐茂樹瞑目發深省何庸馬蹄塵兵鋒迭馳騁

我夢騎赤龍

我夢騎赤龍，謁帝白雲庭。帝方奏大樂，鈞天聲泠泠。木公起獻壽，金母持銀瓶。麒麟伏坐下，鳳尾芙蓉青。蟠桃大如斗，一啗三千齡。太乙顧我笑，冷風吹面醒。

臨安遇革輦

革公東方來，面有和悅色。長裾曳麻袍，散髻岸紗幘。袖書謁大臣，唾手捨恩澤。亟歸裝刀頭，買馬來擊賊。

送周尙文

手把五色筆，人呼老畫師。忽騎六尺馬，便類幽并兒。袖

中安漢書篋，裏平淮碑丞相方。進賢有志當及時，酒盡便可去，少需猶未遲。

壺隱

四山如仰壺，環護深洞府。白雲齊鶴飛，竹杖作龍語。劍術走猿公，簫聲下鸞女。曉來溪水深，零亂桃花雨。

春日寫興

懺懺戀里閭，悠悠感時光。朱顏既易去，樂事何能常。不
有一日功，安流百世芳。起行亂石間，坐近流水傍。舉觥
意頗適，浩歌情復傷。念彼保衡心，忍將天下忘。

三言集卷五
贈石畊子
泖上多異人近見石畊子黃金鑄犁頭白玉磨耙齒朝
鞭滄海龍夜灌天河水種成五色璞幻就一萬紀上補
星文空下揜天柱圯庶息共工爭少佐媧皇理瑣瑣田
舍兒秋成望糜芑

中秋小芝山望月

涼飈起山阿零露下溪曲沉沉萬籟靜浩浩一氣肅明
河瀉匹練白月挂團玉庭柯棲鵲動堦草寒螢煜顧瞻
不成寐興歎忽在目雄才值休運壯士恥雌伏風雲奮

英會談辯騁酈陸寄謝我輩人相期習馳逐

遊仙

處世厭兵火憫生悲歲華安得乘浮雲游彼仙人家下
視萬蛙蟪擾擾成泥沙東望俯暘谷凌晨滄太霞青龍
與白虎簇擁金銀車但恐匪仙骨腐爛如潰瓜

懷古

魯人不傷麟楚狂豈歌鳳王風逝莫追五伯才一閔古
今等飄風興廢迭醒夢舉手招麴生今古兩相送

仲溫畫扇上作假山椶蕉梧竹

櫻欄覆牆陰芭蕉上窗綠涼風起高梧白露下叢竹明月照假山雁啼人未還砧聲不出戶心在玉門關

柬宋仲溫

宋公陣右孟楚子駕左廣陵轆戎車奔奮迅介馬駟力爭良可念幸勝未足做矯矯魚腹磯石磧盤巨蟒縱橫六十四餘奇握在掌衡軸示其端機衝應如響我欲仿佛之伊人竟長往按圖得其妙不覺稽吾顙君非米家狂胡爲技云癢爲君聊發蒙睫前辯霄壤

贈葉秀才

伏劍作說客愧非縱橫時漂流闔閭城僕痲病馬遲黃金亦併盡困頓所不辭獨憐懷寶腹日旰方及炊雖則貧有餘不爲無益悲賢哉顏巷樂瓢飲吾其師

感憤
首二

手持一丈槊坐跨八足馬力可敵萬人英氣邁古治四郊政多壘國恥尙未洒安得大風歌爲君貽勇者汗血產渥洼其名號赤兔高蹄踏生鐵未許泥水汚生猛不可騎惜今無呂布牽去駕鼓車雄心向誰訴

感寓
首二

秋風吹芳草日車縛不住素絲變青髮新人漸成故莫
嗟功名遲政爲讀書誤昔賢雖達道不免在邱墓我騎
白鳳凰清風上天去
遲日照芳辰晴光在楊柳行樂須及時况茲樽有酒綠
髮美少年烏馬犀匕首一笑千金輕章臺街上走賈生
多讀書白骨同一朽

潛齋

驟進易觸辱藏修或得名與其志聖賢不若小孩嬰誰
知六椽茅下隱極品榮歷山與雷澤萬古可與耕大舜
且不辭况茲常人情君看霄漢顯孰似淵泉清

觀倪元鎮王叔明畫

柳長女垣低桃開小樓近凭欄望春色撫髀嘆天運主
人愛遠客清酌倒芳醞坐深頽有泚飲餘臉生暈黃鶴
素豪宕雲林靄聲聞畫圖寶名筆詞章騁雄韻諷誦心
神驚披閱目力紊子生慕膏馥殘剩苦拾攜君教本家
庭翰墨抱遺訓清顏羨軒昂白髮厭孤憤仰珍明月珠
俯愧蜣螂冀高玩固可憐退思當自奮

除夜
首三

今日歲云暮，歷日忽已周。自憐不成寐，靜坐思所由。匪
無濟時心，秉鈞徒廟謀。豈以廣博材，著述驅窮愁。平生
萬金璞，三獻不一酬。竟成唾面馬，不楛失水舟。何如攘
六鑿，保合全天游。放形大化門，逍遙追浮邱。

梗梗集中抱脈脈，有所思明當是四十前。悔那可追，雨
霰促歸夢，畏途瀕海涯。豈無鄉井念，欲往將安之。焉得
御風術，遂我懷歸思。臨觴不及樂，空成游子悲。

跼蹙數時光，鬱悒嘆人事。寒暑終變遷，盛衰常彼此。宇
宙無窮年，人生安得已。天人互定勝，帝德自光被。嗟余

蟣虱然中處，聊復爾窮愁。苟未盡擾攘，亦茲始

題王克孝二十四孝圖

惟孝先百行，惟子乃克之。問子何以克，帝舜吾其師。父
頑而母嚚，乃是舜之孝。苟非處其變，奉養亦常道。不以
克自揭，孰知志乎舜。裂素以寫圖，庶使觀者信。寥寥數
千載，孝行耀青史。圖今止若斯，餘豈非孝子。侃侃貢公
說，英英周子書。舉圖授其概，自可見其餘。嗟哉客省吏，
三公出自茲。永持食祿心，常作奉母思。忠孝不兩途，臣
子匪二身。今日之孝子，後日之忠臣。謂以子餘年事君

三筆集卷五
如事母高步追昔人珠璧耀前古方今風塵際大義
不踰願言存壯節繼寫忠臣圖

春日陪金達可張習之僧祖平燕申屠仲耀氏

晴風蕩新柳春意滿陂塘幸逢二三子同上夫君堂
劇談到時事清燕開蘭觴念茲兵燹年風景殊故鄉
總戎豈乏賢軍氣胡不揚曰子好奇計豪宕無由嘗
乃令鼠蟻輩撫劍歌慨慷賢哉兩申屠伯仲雙玉璜
髯張大雅士雲漢飛鸞鳳睦睦金義門七世行彌昌
席端見謙德愈覺尊而光平公古墨氏詞藻葩天章
雅情雜詠笑懽

樂何茫洋卻憶圍城中黔首紛彷徨析骸給曉爨
易子充枵腸豈無華元心夜登司馬牀懷寶不見用
坐待歲月亡矯矯平津閣而登白面郎

題畫

浮雲浩茫茫青露兩崖擘十尋滴秋潤萬頃停春澤
渺渺沙渚蒲昏昏土岡柏豈無舟楫渡奈此仙凡隔
瞻彼鶴髮翁嗟予兔園冊默默與世忘虛亭坐生白

枕上感興

客枕不成寐丙夜猶展轉香銷篆文灰燼落燈花
翦露

王晉集卷五
三
下林噪烏月斜巷鳴犬鄉心梗寂寞歸路際屯蹇拓疆
良在念擇木詎忘覩嘉猷固久抱忠憤欲誰展豈忘藩
籬護奈此蹄涔淺伊昔山水郡屢興詩酒宴勝覽熟輕
輿幽尋狎芳甸空翠洒心目輕紅破顏面清流朝澄澈
密蔭鬱葱蒨猿鳥各欣適魚龍更變現繁調翕寶瑟雄
儒集珍硯妙境眇隔世良辰迅馳傳憂來竟作惡事去
漫興羨北辰位極高南州禍方煽何人靖妖孽普天罷
征戰沛澤被草木餘光照寒賤一席倘再溫百廢或興
繕殘喘苟未盡太平庶幾見

我有一首

我有駢角弓百步能破敵力強不受檠材美陋越棘時
能斃飛將萬騎莫敢逼翻翻鐵絲箭剡剡金爪鏑鼓寒
霜氣重應手響霹靂豈惟射渠魁眼中已無敵雄哉兩
橐鞬儼若左右翼時來亦大用不偶直暫塞我弓雖少
置未許楚人得

我有鴈翎刀寒光耀冰雪神鋒三尺強落手斷金鐵在
昔臨元戎志在除草竊怒來死不顧決背肝膽裂老蛟
遶腰臥夜枕寒泉冽維時誠女賴豈忍時暫輟中途偶

王令集卷五
四
棄置竟踐秋扇轍塵埋土花暗繡澀神氣滅思之終永
傷默坐慘不悅敢忘漢宣詔不負呂虔說金風吹秋郊
賊馬政侵軼又當攜女去舊義未遽絕莫瑩鵬鵠膏恐
汚荆卿血

送嚴掾從軍

昔登淮安城四面望楚國韓信釣魚處水落石崩崩方
其不得志俯就婦人食磊磊胷中奇固非俗眼識君去
終作掾而有自得色竊窺步驟閒抱負已莫測堂堂熊
虎軀傑立萬夫特必能樹奇勳歸解眾人惑毋俾淮陰

侯地下三嘆息

趙奢簿書時已能不撓法及其居大任一戰斬秦甲笑
談解圍城豈問道險狹嚴掾抱奇器意豈在筆劄平揖
左轄公從容借前筴梁宋齊魯郊東西久持夾敵情指
顧閒咳唾隱顛踰誰云擊搏便褶袴事韎韐沈船防夜
渡秣馬備晨壓拙速勝巧遲哀哀民困乏

哀蒼頭

蒼頭何地客來在浙江東母逐錢商去父兄歸務農力
綿不足使齒弱未禁庸襤褸衣裳薄倉皇途路窮攜來

玉簪集卷五
客窗下給役過殘冬缺舌蹇蠻語瘦軀餘病容鑿冰汲
泉水踏雪遞書笥所愧資儲狹深防用度豐無金施惻
隱有恨寄怔忡空慚李長吉短調問巴童

次韻周履道爲予題所畫山水

突兀久遁日嵩律思盪胷故原忽在望蒼翠疊重重削
鐵下直壁潑黛然晴峯百怪遞走現萬媚爭來供軟裯
記獨坐幽屐懷孤蹤澄藍止水靜新綠嘉樹濃前瞻甫
沒鳥右顧方來龍依微霽色做宵眇數聲鐘隱心紛俱
集勝事諒難從幻境且自怡真樂何由逢不惟步劇韻

亦以寫愁容

席上

彼美瑠林姬綠雲何盤盤清歌珠落斗妙舞玉成團風
急酒暈薄月斜花露寒翦燈續殘醉把袂接餘懽雖非
長夜飲猶勝萬錢飡

次韻吳近仁

昔騎千里馬首絡黃金羈馳射麋鹿場麗龜以爲奇鞍
心置鐵鎗腕下懸銅錐壯心久落莫功名安可期

送陳惟允

王晉集卷五
抱劍入帝都未知何所求觀其辭氣閒已類朱阿游肝
膽正激烈既悲還復謳欲銷天下難先斷佞臣頭

浩歌一章

少小恥讀書袒裸習槍梃雄心不自禁氣壓楚諸項怒
提彭城師能使睢水絳四十未得祿蔬食伏陋巷始悟
平生狂適增木然顛憂來發浩歌忿激聲不降精誠上
感天貫日生白虹

對雪示張髯

陰沴妬人日苦寒逼燈宵虛齋對春雪况值驚騰颭吹

去映空沒飛來著砌消深憐役夫恨荷鍤上河橋

題畫

愛此溪上山結茅斷橋裏停雲宿檐阿積雨上階址嘉
樹生秋陰扁舟蕩春水晨鐘上方來日高人未起

玉笥集卷五

譚瑩玉生覆校

玉笥集卷六

元 張憲 撰

古詩 七言

送鐵厓先生歸錢塘

時新除江西提舉

團花染累吳蠶繭。五色文綾出金翦。海風吹度滕王宮。
南浦西山畫簾捲。天狗夜吠聲如雷。東奎西壁昏煤炷。
土洲自可駕黃犢。鐵箸何用畫寒灰。牛酥燭花春未老。
湖上同誰翦芳草。真珠酒瀉紫蒲萄。金錯刀鑄紅瑪瑙。
六橋楊柳香霧深。吳娃一笑千黃金。莫邪不作老龍舞。

鐵管自成丹鳳吟。軟輿送別湖源道。江花照人日杲杲。
長風吹送書畫船。先生眼空方醉眠。

唐五王擊毬圖

興慶宮前春正熱。綠楊夾道花如雪。毬門風起日西斜。
五馬歸來汗成血。潞州別駕醉眼纈。雙袖傾欹擁岐薛。
申王按鞞宋王馳。杖撲毬囊手親挈。草平如掌馬力均。
玉鞭十里不動塵。黃門扶入五花帳。大衾長枕如家人。
花萼相輝雨氣寒。樓中歌管漸闌殘。紫驕不踏毬場路。
萬里青驄蜀道難。

中秋碧雲師送蟹

天風吹綻黃金粟。簷前老兔飛寒玉。客窗不記是中秋。
但覺鄰家酒漿熟。泖田秋霽稻未鎌。葦箔竹斷收團尖。
紅膏溢齒嫩乳滑。脆美簇簇橙絲甜。無腸公子誇矍鑠。
兩戟前驅終受縛。饜心晝煖白玉臍。照眸夜泣紅銅殼。
麴生風度亦可憐。且對霜娥供大嚼。酒後高歌繞碧雲。
九峯一夜霜華落。

天香閣觀王元章梅次其所題詩韻

天風閣下秋氣清。上人邀我閣下行。舉頭鷲見王冕畫。

使我塵埃雙眼清。摩挲素壁如鏡平。上有萬點冰花明。
若非華光騁三昧。誰使造化驅百靈。繁枝久不林下見。
老幹忽來堂上生。拳拳磈礧鶴膝凸。屈曲盤拏猿背撐。
薄寒似覺霜氣勁。慘淡似有參星橫。酒家門前曉月落。
羅浮夢裏春風輕。枝閒積雪擬待伴。樹杪翠衣疑有聲。
皎如姑射太綽約。靜似處子多娉婷。鐵心石腸不挂念。
冷蕊疎香偏動情。短籬倒照日杲杲。野橋春水波泠泠。
空懷孤山已半世。不到西湖今十星。何當結茅里閭近。
相與把杯懷抱傾。閑扶竹杖石上坐。起持鐵笛風前鳴。

君不見梅花艇子浮如萍。浮遍鑿湖八百里。胡爲送死
將軍營。嗚呼胡爲送死將軍營。

松隱圖

松陰道人松作屋。冷松衣松松下宿。秋簷露溼女蘿衣。
午竈風香茯苓粥。華頂神遊跨白鸞。繁陰獨步攜青鹿。
也識秦封解汚人。十年夢斷丁公腹。餅輕花粉試新黃。
液熱天漿沸醞醪。卻笑張良見事遲。老盡容顏方辟穀。

青山白雲圖

青山青青白雲白。一尺小溪千里隔。扁舟樣岸不見人。

雞聲何處秦人宅桃花流水春粼粼不識人間有戰塵
待得紫芝如掌大歸來甘作太平民

贈答薊邱聶茂宣

憶昔往弔望諸君曾識燕南屠狗者昭王臺前春雨晴
綠柳陰中共馳馬短軀五尺頗精悍插戟黃髯不盈把
青樓買笑土揮金紅粉供筵龍作鮓酒酣慷慨發悲歌
老淚滂沱苦揮洒美人亦起撥四絃密怨濃歡一時寫
漏深丙夜不肯睡剪刀落盡銀燈地馮陵大叫不自知
豈問軒駒有旁舍皇帝神聖丞相賢廣寓承平樂有年

文華正富膽力盛牀頭况有黃金錢雄豪自許魏無忌
氣岸誰推魯仲連淹纏歲月不知老豈信朱顏易枯槁
門前客去金亦盡故國歸來空懊惱十年千櫓苦風塵
碧血白骸蔽秋草武功不就文業荒悔不當年致身早
飄泊江湖未有涯南北東西營一飽薊門學士燕南豪
平生恥交兒女曹憤來幾欲擲敗筆老去猶思撫大刀
留懷磊落厭謫詐狐媚每笑奸人勞報仇不搏韓相死
籌邊肯使單于逃家徒四壁避風雨儲無儋石充烹庖
撐腸拄腹十萬卷光燄自與山岳高蹇驢一旦去京國

扁舟萬里衝洪濤詐齊懦魯兩蠻觸勾吳於越雙蠓蛸
眼空四海礙兩脚身小九州輕一毛空懷長策繼董賈
未忍嘉遯追由巢謁來水國共作客一見便爾悲綈袍
軒昂惜不霄漢遇老鈍乃爾窮途遭窮途相遭兩無那
君政窮愁我饑餓神交契合不忍離風雨茅齋數相過
瓦盆濁醪爲君酌劇韻長詩招我和狂心頓忘新慙煩
癡情猶懷舊驕情詣君脫巾下牀坐容我解衣上牀臥
片時高興且睢張萬斛濃愁總摧破須臾起立爲君賀
一片雄心勿輕挫但當飽食待時需會有天書覓王佐

顛連困苦未足憂富貴從來伏奇禍

李嵩宋宮觀潮圖

磁州夜走泥馬駒臥牛城中生綠蕪炎精炯炯照吳會
大築錢塘作汴都玉殿珠樓連翠閣七寶簾櫳徹雲幙
生移艮岳過江南不數東京舊懽樂茂樹盤盤迷綠雲
龍飛鳳舞峯巒奔玉牀下壓大江小海水正入東華門
木樨花開秋可數統統靈鼉振天鼓海門一線截江來
雪壁銀城晝飛舞吳商楚賈千萬艘黃龍戰船頭尾高
豈無海道走中土長驅逐北乘風濤烟霧蒼蒼繞城郭

屋瓦魚鱗互參錯百萬騎民事醉醺坐使中原厭羊酪
因循六帝不復讐西風八月凭江樓攢宮人飲白骨恨
洪波不洗青衣羞邦基削盡師臣逐軹道人降子嬰哭
繡曾文錦踏浪兒反首誰能報君辱廟子沙頭卓大旗
天吳縮頸不敢馳行人指塔話楊槌三十六宮秋草飛

董羽龍

南山隱隱雷作聲北山油然雲氣生蜿蜒百丈走神物
海水壁立青天崩南陽董公苦揮洒百世誰能辯真假
鯉魚夜躍蜻蜓飛腐甲頑鱗滿郊野九重殿深天宇廣

不覩聖顏空悵惘乃公別有三尺泉爲爾往誅當道蟒

古城八詠

在富陽
江南

黃公洞

辟穀功臣神骨腐袖裏遺編竟何補炎精火斷穀城祠
二十四陵皆黑土深山窮谷多春風十月九月桃花紅
篝燈煮石自卒歲廢將不煩隆準公

黃巢寨

石徑山前夜飛矢金色蝦蟆渡江水千年碧火照黃坑
鹿角蒺藜圍故壘黑風搖關金統破人骨糜成鋒已挫

怨魂不捨入仙營哭聲夜繞陳州磨

金雞石

黃道荆榛鬱儀死跂足趾閒生黑子紅光相盪白晝昏
中夜惡聲四旁起絳衣朱幘天下雄時乖亦隨星殞空
誰能琢枕獻天子一聲啼白扶桑東

驪珠石

秦皇鞭石石入海驪珠頷下生光彩金聲扶上碧壺顛
五色燭天光不改共工觸山梁棟搖百川震蕩海水號
何當用爾作大礎穩托不周天柱牢

棲鷓巖

霜崖壁立秋風肅野鷓東來巖上宿老拳夜握煖爪禽
義心誓磔饑蛟肉通都大邑狐狸號鳳凰無語鴻鵠逃
銀黃免鵠不下擊紫鞵空用金錠絛

棲鶴峯

遼東失却丁令威赤壁夢裏橫江飛明河洲頭槎已爛
千歲去家今始歸晴峯歷歷入雲小獨立秋空望華表
華陽直逸上清來鐵笛一聲山月曉

黃天蕩

昆明劫火燒成灰臨平葑湖撥不開黃泥萬頃下無底
海眼一線通往來南徐江邊海鯨走江神頓足黃龍吼
便翻銀漢濯泥沙要此妖蛇先授首

來青閣

宋大理丞馮驥讀書樓也
宋亡驥戰死獨松關下

獨松關下忠魂歸明珠洲邊樓閣飛怪底青山在屋裏
戶牖自能吞翠微神芝山名一朶盪曾舞翠滴寒光溼秋
雨諸孫炙盡竹書青從此襟懷小齊魯

題竹雪齋

去年曾賦竹雪謠今夜適來齋下宿入門見扁已不凡

推窓縱觀清可掬長竿挺挺森似束密葉錯金幹裁玉
萬鞭走地虎脊露千梢拂雲鸞尾曲大嚼雖無笋可燒
雅歌剩有詩堪續肩輿竟造欲誰共把筆狂題許吾獨
經樓曉霽霧初散僧舍秋高酒初熟滿引觚稜滌塵慮
大拍闌干豁吟目江南九月天尙燠那有瑤光洒銀屋
扁舟興盡且歸去雪裏再來尤不俗老僧一笑萬山靜
幽鳥不鳴千樹綠

菊潭爲顧子順賦

盤龍塘下潭如井百尺甘泉冰雪冷瓊彝一勺露生香

玉簪集卷六
能黑華顛駐光景九月十月天雨霜七十二種分秋芳
粼粼曉碧卓倒景白者白玉黃金黃咀菊之英飲潭綠
不數南陽舊甘谷童子開門濯帽紗報道新醅夜來熟

題不礙雲山樓

遠山近水濃淡清朝雲暮雲先後生我樓雖小實空闊
雲自往來山自橫山耶雲耶兩無礙地久天長果誰在
渺茫蜃氣等虛空縱有軒窓何足怪爲愛雲山構小樓
看山看雲今白頭山形起伏只如舊雲溼雲晴知幾秋
開窓向山作長揖長揖雲山兩俱入推窓送山出樓去

山出雲歸樓自立愚公好勤不奈閑孫孫子子厭躋攀
眼空四海本無物何事欲移門外山

題壽老人松年圖

我昔湖上看眠松蟠屈蒼龍陰十畝青天晝暝雷雨黑
白日猶疑鬼神守却憶僧前如雨落春雨新秧不盈握
如今合抱復蔽牛偃蹇輪困臥邱壑松下老僧金骨仙
親手種松忘歲年倒持一尺白鸞尾拄頰聽風當晝眠
茯苓作粥粉作餅千斛松醪供醕酌不用飛丹駐玉顏
前身自是陶宏景人道大椿多壽齡以松視椿椿未靈

三管集卷六
九
根盤入地九萬里劫火一番枝更青

題畫柏

憶昔皇輿九鼎重萬里荆揚遠朝貢榎栝柏蔽江來
竹頭木屑俱成用自從劫火煽孽風豈有樛枝宿鸞鳳
翦墳伐廟鬼亦斂拔石移根山欲動戎車戰艦莫計工
塗肝碎腦空喧哄斧斤不時入山林毀圮樓臺禍梁棟
載民舟楫挽民牛盡廢耕耘遠防送孔明祠下根已無
黛色參天恍如夢摩挲香葉望太平何日可消天下痛

爲唐元仲彬詠白雞

海南曾進司晨鳥黑骨白毛天下少桃都雪後獲火精
陳倉月下逢陳寶意態不殊韝上鷹攫身側目見者驚
玉翎冰翅逼人冷半夜牀頭聞劍聲長鳴自解作人語
何用嗶嗶叫風雨賈昌輕薄宋宗愚可惜雄姿久無主
槃跚獨步暗萬雌紅冠滴露生燕支昂藏勇氣莫敢抗
啼得晨霜皆倒飛蓮花漏箭一百刻三叫能令天下白
秋風吹荒蜀道祠露溼螢窓對書客

爲隱師題林若拙畫

阿師堂上生雲霧突兀峯巒起縑素元雲靉靄溼丹青

王晉身卷六
積翠爛斑落庭戶漲空嵐氣湧波濤噴石寒光飛瀑布
鐘昏烟寺僧未歸澗跨板橋人不渡黃茆幾簇尖頭屋
綠林一帶無根樹茸茸碧蘚雨乍晴恰恰黃鸝春欲暮
新水桃花溪上舟閑亭芳草沙頭路意匠潛移造化機
筆端想有神靈助尙書在昔已擅場弟子如今稱獨步
抵須指畫索我題不惜長篇爲君賦

張以文夏山欲雨圖

董元夏山今罕覩名家所藏皆可數海上張郎法度雄
胷次嶙峋獨追古山腰字字雲氣吐石頭流汗日當午

殷殷雷聲黑太陽盛暑鬱蒸天欲雨木葉颼颼風滿浦
收港小舟催進櫓塢裏農莊八九家政望甘霖沃焦土
山川高厚自有神肯使膏腴成瘠鹵我方憫雨面高堂
坐閱斯圖心獨苦豈無手板對西山瘦頰憂來不堪拄

題高尙書畫

土山豐隆石山瘦大溪春容小溪驟遠林溼翠結秋陰
茅屋空村鎖清晝板橋跨渡一逕微泥滑只憂騎馬歸
雲昏列嶂最深處一段楚天無雁飛高侯畫山誰與匹
名重當今稱第一萬疊千尋丈尺閒益知庸工無此筆

論畫甚勿先論人以名求實常失真但看所畫何如耳
強辯不須多討論尙書才藝真英物胷次雄蟠山水窟
每驚爽氣起高堂恨不日來閑拄笏

題華山高臥圖

蹇驢不踏封邱塵華山歸臥雲臺雲曲肱枕石且適意
世事耳邊殊不聞建隆天子小天下自起潛行風雪夜
經濟元臣不敢眠夜夜衣冠待車駕南征北伐事紛紜
猛將四出貔貅軍盡取荆吳并蜀廣牀頭鼾睡只容君
圮橋進履圖

暴秦肆吞如盜劫六雄繫頸甘婦妾下邳少年真可憐
不保相韓先世業千金買死博浪沙豈謂大椎摧副車
遍搜十日幸脫網蒲伏草中蹲怒蛙穀城老翁老無恥
坐倚橋亭落雙履英氣猶能壓後生笑呼孺子爲吾取
孺子容貌雖婦如孺子心膽勇且羸搏羸搏項不必屈
乃肯屈身於老夫翁知孺子已可教一卷奇編投所好
不獨身榮帝者師四百漢基由此造保身末路異韓彭
功在三宵冒曉行後來廷尉號長者猶待王生全令名
宿永福寺醉贈舉講師

三言集卷六
九月十月天氣暄走馬看花來福泉石頭衝水雪平礪
楓葉著霜紅蔽川講師倚杖出速客邀我樓頭看山色
秋天日落風四嗥清氣逼人眠不得金籠巨燭光煌煌
舉觥一飲連十觴明朝酒醒忽上馬兩袖西風歸興長

周昉橫笛圖

一婦跨燈如習騎一婦鵠立類勇士一婦橫笛坐胡牀
容貌衣裳畧相似蓬鬆雲髻作嬾粧丫鬟手擎紅錦囊
人言天寶宮中女我意梨園舊樂娼憶昔承平生內荒
宮中消息漸難藏昨宵一曲甯哥笛明日新聲滿教坊

春嬌滿眼情脈脈喚起紅桃親按拍不將三弄作伊涼
潛把閑情訴秦虢聲悽調低和絃索碧然有聲如裂帛
月落長安天四更六宮一夜梨雲白

桂林圖

瑤階夜冷莎雞泣老兔西飛天宇溼萬斛秋香捲海風
丹砂滿地誰收拾太湖仙子月中立青瑣畫闌塵不入
玉鞭一尺跨白鸞笑向霜娥作長揖

太真明皇譜笛圖

黑奴絃索花奴鼓譚奴撫掌闌奴舞阿環自品玉玲瓏

玉笥集卷六
御手夷猶親按譜風生龍爪玉星香露溼櫻唇金縷長
莫倚花深人不見李暮側足傍宮牆

玉笥集卷六

譚瑩玉生覆校

玉笥集卷七

元 張憲 撰

古詩 長短句

雙龍圖

雲谷道人手持一片東溪纒雲林散人爲作雙龍出入
清潮圖硯池濃磨五斗墨手塗脚踏頃刻雲模糊既不
爲爬山引九子亦不作掣電吞雙珠但見一龍盤空偃
蹇飛下尾間穴一龍攪海奮迅直上青天衢雄者筋脈
緊雌者腹肚麤雙衝交挺白玉柱兩角對樹青銅株宛

宛修尾捲蹴浪花白聶聶鉞甲挾拍天風烏性馴肯入
孔甲駕氣惡欲踢豐隆車張吻啖阿香舞爪擎天吳轟
霆時或取旱魃飛雨自足蘇焦枯寸池尺泊雖云不能
一日處十年未用猶可高臥南陽廬雲谷子七寶鉢盂
深袖手雲林子九環金錫且載塗吾將倒三江傾五湖
洗餘百戰元黃血盡率凡鱗朝帝都

贈天馬生

天馬生騎天馬三尺昆吾手中把有時上殿前斬佞臣
頭有時臨戎怒斫奸雄髀天馬生馬有千里材劍有連

城價馬或爲館人脫劍或爲徐君挂官可棄金可捨此
身可殺不可罵喜不爲兒女顏怒不作粗豪吒七尺雄
軀人可齊一片義心誰得畫天馬生嗜利如嚼蠟嗜義
如啗蔗天馬生豈不知四海若潰瓜九州紛解瓦十年
苦戰血成窪千里流移肉爲鮓八陣圖吾不祕出師表
君當寫吁嗟乎天馬

滄浪舟圖爲謝士英題

謝公拔劍斬吳松截得滄浪一泓水倒卓青天入水中
一葉漁舟凌水起舟與水升降水與天拍浮雖無具區

三萬六千頃混淪一片元氣清悠悠謝公本好勝况復
知慮周常恐有力者夜半偷挾舟當頭築土山對面圍
蓬邱花竹麗晴晝葦蓼涵高秋映蓮去白鷺穿柳下輕
鷗鄰鄰錦生瀾汨汨珠跳漚綠蓑挂鷁尾畫槳倚船頭
謝公天性頗疎散拄頰日來凭柂樓豈無濟勝具恥襲
康樂遊亦有鎮靜才嬾懷安石憂手把六尺珊瑚竿餌
懸一線黃金鉤篷窓雨不閉椽纜夜忘收天隨舞元真
謳名不變鴟夷服不異羊裘舟下風清韻欸乃花閒水
響聲夷猶我方買棹事遠游燕齊楚越將周流長淮大

江不滿眼褰裳舉足如涉溝燥吮吸雲夢隻手掬滄洲
邈視謝公水漚洼無一杯舟車二十年窮途困遐陬泔
蹄起波浪潢潦弄干矛故道走運河洪濤沃九州我前
舞鯁鱗我後躍蛟蚪沴氣蔽白日荒荒使人愁既匪急
名宦又不勤商賈胡爲泛此不測淵萬里遑遑忘樂土
猛省急回來歸程已豺虎江湖鼎沸海飛烟膏染荆榛
血漂槽走覓謝公舟求作滄浪侶謝公舟在東海濱滄
浪水深多縱鱗飛橋不可渡戰艦莫通津鱸美四腮鱸
羹滑千里蓴雲淨水光淡波來風力勻倚篙紛綠藻落

三管集卷十
三
柁斷青蘋數舉鸚鵡杯滿酌桃花春飲餘呼蠟屐醉起
岸綸巾濯足濯纓儘由我孺子有歌公不嗔

贈馮以玉宣使

余素奇以玉有奇骨且有奇志一宣郎何足以辱之然行遠自邇升

高自卑古人皆然故敢以女家破莎車平赤眉之勳業期之

馮宣使清如冰溫如玉年未三十享天祿既不學腐儒
老書卷又不學寒士臥空谷東鄰兒子癡窓前弄絲竹
西隣兒子嬌穿域事踟躕獨持一片丈夫心萬里虎飛
思食肉南垣相公選行人千萬人中獨拔君樓船夜破
海東浪驛馬北馳天上雲作徒不必論魏尙焚券抵用

驚田文忠肝義膽刻心骨大掃羣醜書奇勛李家大黃
箭六尺王家小鐵鎗百斤西京奉世東都公孫功名至
今千古存宣郎職小未足論

送宗上人

海上宗師美如玉手執落花流水軸扣門求我送行詩
自說移禪向西竺西竺迢遙十萬程豺虎塞途那可行
武林別有小西竺八面蓮花圍化城層巒疊嶂開佛國
孽火劫風然不得浮杯不用渡東洋飛錫無勞問西極
樹撐鬼努力石鬪虎攫食水奔龍折身山回鳳鋪翼雲

起太虛白雨來清晝黑月輪夜挂龍樹東斗峯曉落猊
峯北玉枝風動兩元猿金沙水冷雙鴻鵠素食不絕天
廚供禪衣自有雲機織水南寺隱隱傳石鐘石上座鏗
鏗振金錫寶髻無邊發象光長舌有聲飛霹靂贈君誌
公杖頭刀與尺爲我裁量松下石待吾釣盡吞舟魚分
爾半巖懸襪裊

憎龐

武陵老祖死盤瓠至今子孫奸如狐懸蹄養眼亦常類
而况細腰矮脚俱慵鴛鴦倉九尾古聞有茹蕘四尺今

非無胡爲蠻種肆獐惡邈視宋徒欺韓盧獨不見陸家
傳書走長途張家注睛昨奸佞楊家袞草濡焦枯徒能
殺都官走愛弟逐華氏追夷吾吠堯尙有說食桀良可
吁籍口視盜曾未殺拱手學人何足誅吾常怪漢祖少
恩夷皋無謨蕭何短智李斯實愚族信醢越痛可惜捨
穿喉盾尤無辜宮中牝雞除不得發蹤指示言何誣東
門狡兔自無恙望夷馬鹿將奚逋西旅底貢實自召西
園枉用銅司徒分陝保奭不可見使我悲憤思樊屠吁
嗟乎提彌明膽氣麤金椎不舉良非夫

詠雙陸

君馬一十五臣馬一十五共成三十騎相拒河之滸君
馬黑虬龍臣馬赤虓虎盤旋兩陣閒不復計行伍彎彎
水中月蛾眉挂天宇疎星二十四薄曉見燦者亂眼無
旌旗寂耳罷金鼓奔衝互馳驟交縱肆擒虜君馬踰津
梁臣馬越城隍君馬渥洼種一日千里長臣馬的盧骨
一躍五丈強君馬左馳迅飛電臣馬右驟激羽箭東關
未下黃金鎖西塞先局紫鑰鍵牙散宛轉兩叫喧喝六
呼么破顏面君不見宮中無子武嬰悲席上有情韋后

嬉典籌天子不自振地下孤臣血泪垂

賦西鄰兒東家生各一首

西鄰健兒書不讀駿馬硬弓習馳逐十年遭逢天下亂
一品榮食卿相祿出專邊庭分闔寄入坐朝堂秉鈞軸
重輕楚漢一諾閒指劃成敗千人服分茅裂土趣刻印
墜聖流丹新賜屋我曹何爲事筆硯風雨西窓翦殘燭
飲酣遽高歌憂來思慟哭嘗恐少年人思之未精熟報
國勿論命愛君終獲福功高心愈下志靜欲易足君不
見淮陰壯士功益世一請假王赤三族

東家老生面白皙脫粟五升逐日糴燈窓埋頭理文字
瘦兒啼饑妻夜績悄然窮巷車馬斷挂戶蓆簾遮敗壁
頓生髀肉暗垂泪懶倚筋骸愁運甕寂寂常羞鄧禹笑
咄咄不忘殷浩戚心如秋風鷹在韝志若夜雨馬伏櫪
豈無六鈞弓牽弦誇破的亦有五尺戈交臂習搏擊痛
擬絕秦書竊草罵曹檄深愧死傷勇事此一人敵君不
見孟軻四十不動心有道可援天下溺

贈日者

我生之年歲在西日掛龍角身懸柳水爲命元用金母

十年落限空搔首紛紛豪傑爭趨走雌雄未決誰能剖
知子有術術不苟肯以公侯許誰某嗟余流落成老醜
豈有文章垂不朽逆旅相遭偶攜手許我功業可期貧
不久囑君爲我三緘口過眼浮雲我何有且飲今宵花
下酒莫管明朝殺敵完換取黃金印如斗

送康上人歸觀兼遊方

湖之西浙之東山如舞鳳水如蟠龍精藍古刹據其上
往往煥爛金銀宮蓮臺貌座事轉換天龍圍繞森金銅
山珍海藏列怪異琅玕瑪瑙紛青紅雲廊月殿綿亘不

見日蜂房蟻戶開。簾櫳法門自別教。禪律一蒂乃爾分。
三宗神僧大德亦閒出。闡揚道德誇神通。地龍凡聖相
混雜。服色則類實不同。五山十刹占奇觀。天生鬼造非
人功。三竺靈隱在湖上。南北對峙雙高峯。飛來小朶割
鶯股。桂子萬樹吹香風。冷泉一派瀉寒玉。六月冰雪清
心骨。天台石梁跨澗險。莫渡瀑布萬丈飛。銀虹半千開
士住。方廣神異變現初。無蹤插天絕頂露石骨。雁宕妙
處宜秋冬。天燈夜照舍利塔。雲竇咫尺鄰天童。桃花小
白境界別。大士出沒洪濤中。伏龍五洩屬婺女。徑山天

目巢雲松自餘佳處不可以名記。青鞋布襪山萬重。僧
康僧中雄弱冠。祝髮辭乃翁。攜錫下赤城。千里邀吳松。
十年值亂離。汨汨悲途窮。一朝忽憶歸省堂。上老因之
遍扣叢林鐘。僧康雖浮屠。讀書頗聞道。不背君父恩。不
違佛祖教。侍膳與問安。劬勞知所報。移錫與駐單。去住
從所好。泉石足盤桓。烟霞堪笑傲。水不畏蛟龍。陸不虞
虎豹。僧康爾佛徒。有杯可以渡。有葦可以桴。真山真水
處處宜。爾居何爲袖。軸求我書我書三。過讀於爾無補
徒誇諛。東或越西或吳。少畱一席地。小結松間廬。爲報

兩邦山水窟不妨我亦賦歸歟

送馮判官之昌國

斬奕將軍飛上天十年海水生紅烟驚濤怒浪盡壁立
樓櫓萬艘屯戰船蘭山搖蕩秀山舞小白桃花半吞吐
鷗夷不裹狀元尸白日雄兵圍帥府長鯨東來驅海鯨
天吳九首龜六眸鉅牙鑿齒爛如雪怒殺小民如有讐
春雷一震海帖伏龍變海魚安海族烟青涵竈雪翻盤
浪煖黃魚串金鏃海鹽生計稍得蘇職貢重修遵島服
判官家世忠孝門獨松節士之奇孫經綸手段飽周孔

豈與弓馬同等倫晝窮經史夜兵律麟角鳳毛多異質
直將仁義犯笞榜恥與姦賊競刀筆吾聞判官昔佐元
戎幕三軍進退出籌度便移韜畧事刑名坐使剽游歸
禮樂鳳凰池麒麟閣酬德報功殊不薄九天雨露聖恩
深萬里扶搖雲路廓

題富春吳雲槎皆山樓

前樓後樓山峩峩東窓西窓石盤陀巘岈犬牙峯錯綜
輻輳虎口若相摩便如乘標導伯禹徧歷岱華踰嵩嶓
誰移琅琊置樓下環滁形勢迴向斯樓多奔巒峻嶺曲

折走奇狀寒肩瘦脊韁鎖千飛鼉風雷變現吐神怪草
樹蓊鬱迷天羅白雲漫漫下無底萬頃往來如海波松
栟栝柏直上盪日月元鶴赤鳳皆來窠雨樵烟牧異昏
曉笠戴黃竹蓑青莎皆山人不食天子祿青纈紫綺
雙鳥靴拄笏夜上東谷月抱膝晝晒南庭柯銀虹百尺
下挂屋簷角曲澗宛轉盤旋渦山人樓居恣豪飲谿訝
咲口頻醺醞偃息野樹臥石枕起舞落日攀松蘿醉翁
作記冠一代塗竄舊藁無差訛文人才士亦繼作詩賦
頌美何猗那嗟余半世苦奔走官馬大野舟濁河殘山

剩水不到目清賞有癖今成痼蜃樓消長不足較但使
有山猶可歌

贈馬庸

既不能學書記姓名又不能學劍敵一人丈夫武定禍
亂文經綸捨此何以立我身扶風豪士有馬庸軀幹短
小氣吐虹自言若不致身鳳凰池亦當安身虎豹叢如
何尙荷戈遠戍東海東吾聞王師夜報捷席捲千里風
塵空何不泛樓船兮鼓南風渡長江兮追羣雄馬豪士
誰不死努力功名從此始爲我酌酒誓江神曰所不盡

取中原歸國家復濟大江有如水

題黑神廟

雄巫啞角神犀吼翻脚翩躚起筋斗血倏怒嚼葛黨刀
剝面腥風下天狗烏騅擎雲捷飛豹金獸吞頭渾脫帽
青蛇丈八裊蠻旂北府新分南嶽號捲魚鷗吻高插空
飛藿列棟紛青紅花裙草袴自膜拜白日椎鼓夜擊鐘
莫搖酋長不平賊十丈龜趺誇石刻既不能阜旂元甲
接武黑雲都漫綴竿旄半天黑君不見兗州祠鎮星會
稽借鬼兵井埋骸骨爛屍與雉堞平烏乎五花營千里

馬珠如礫金如瓦亡妻走妾各事仇三尺弓弦泪成把
黑神黑神何爲者

玉笥集卷七

七

玉笥集卷七

譚瑩玉生覆校

48-12793

